

Trivixan, zoè confirmato Zuan Alvise Rizo, qual fo eletto per Colegio con ducati 300 a l'anno.

201 * *A dì 24.* Fo la vizilia di Nadal. Sier Zuan Vituri stato provedador di cavali lizieri, qual vene amalato et è varito, et vene in Colegio, referi alquanto zerca li stratioti e cavali lizieri.

Etiam è zonto di qui il conte Mercurio, quale questa matina fo in chiesa di San Marco con tre capi di stratioti con lui, vestiti di caxache d'oro di restagno, qual fo quelli che la Signoria fe' cavalieri l'anno passato per la vittoria feno su la campagna di Verona, presi molti fanti e roti; el qual vol alcune cosse di la Signoria nostra.

302 *Item*, a Lio zonse questa matina con un gripo l'orator dil Signor turcho, qual smontò a Lio, et per la Signoria fu mandato alcuni zentilomeni vestiti di scarlato a Lio, di quelli fo chiamati, tra li qual lo Marin Sanudo fui, et fossemo N. 16 et non più, *videlicet* li segnati davanti notati di sopra. Et sier Andrea Mozenigo el dotor fe' le parole, dicendo fusse il benvenuto, et la Signoria lo vederia volentiera e si allegravemo di la vitoria ha auta el suo Signor etc. El qual ringratiò molto. È homo di età di anni . . . nome Mahumeth bei, è nipote di Synan bassà, vien da la Porta dil Signor, zoè di Aleppo, si aritrovava al conflitto dil Soldan, e dice il so' Signor è un altro Alexandro, e tien Tauris che è la sedia dil Sophi; et come è tre mexi parti di Aleppo, venuto da olacho, ha con lui persone 11. Or montati in barca, lo acompagnassemo a la caxa preparata, qual fo di Zuan Dario a S. Vio, et se li dà per spese al zorno ducati 5; ha uno turziman con lui, *tamen* era il nostro turziman Hironimo . . . qual è a la cancelaria.

Ancora zonse sier Alvise d'Armer, vien baylo et capitano di Corfù, et sier Piero Sagredo, vien provedador dil Zante.

Fo dito in questa matina ch'el Turcho abia auto Damasco per forza, *tamen* la sera se intese il contrario; et si aspeta le letere, qual è portate per il maran di Minati che è in Istria, qual vien di Cipro, per le qual se intenderà la verità.

Di Udene, di sier Giacomo Corner luogotenente di la Patria, di 22. Come li comessarii cesarei è in Gorizia li havea scritto aver letere di la Cesarea Maestà, over dil Consejo di Yspruch: come era conclusa la paxe col Cristianissimo re e trieva con la Signoria nostra; pertanto erano contenti di levar le ofese de li, e cussi fariano . . . etc. Et manda la dita letera et la risposta fatoli, la qual forsi sarà notata qui avanti.

Et, per Colegio, li fu risposto debbi *etiam* lui

levar le ofese, et cussi fazi le barche longe non fazi danno a Maran, si per quelli di Maran li sarà mandato a dir cussi *etiam* loro voler far.

Et nota. Fo per Colegio fato un contracambio dil cavalier di la Volpe, era governador in Friul, qual è preson a Gradisca, in el capitano Renier todesco, qual era in Toresella col conte Cristoforo. Il qual capitano Renier ozi fo cavato fuora, con segurtà di ducati 3000 di Blusfardo mercatante todesco di Fontego, et sier Federigo Vendramin qu. sier Lodovico ch' el non si partiria di questa terra. El qual, cavato fuori per sier Zuan Antonio Dandolo, è provedador sora li presoni zà molti anni, per il qual cargo al presente vien in Pregadi per parte *alias* presa per il Consejo di X, andò ad alozar in Fontego di todeschi: starà in questa terra fino il cavalier di la Volpe sia liberato.

È da saper, da Treviso si ha avuto fin qui ducati 3000, et quel podestà sier Nicolò Vendramin usa ogni sollicitudine per aver il resto.

Item, dil Friul si arà li danari, zoè li ducati 6000, et vol la Comunità donar non che imprestar, come dirò di soto.

Di Padoa sarano un poco longeti, et cussi di Vicenza.

Da poi disnar, per esser la vizilia di Nadal, la Signoria fo in chiesa a la messa, qual fo compita a hore 3 di note, vice doxe sier Andrea Baxadona el consier, con li oratori domino Zuan Jorio da Dresano et quel di Ferara domino Giacomo Tebaldo. Era 7 procuratori: sier Nicolò Michiel, sier Thomà Mozenigo, sier Domenego Trivixan, sier Alvise da Molin, sier Zorzi Corner, sier Lorenzo Loredan et sier Alvise Pixani. Et a caxo, perchè va con la Signoria uno Consier e uno Procurator, fo a venir fuora di chiesa sier Francesco Corner el consier di sora di suo padre sier Zorzi procurator; di la qual cossa ne ho voluto far qui nota. Il qual sier Zorzi Corner è in gran felicità: (è il) più richo patricio di questa terra, ha de intrada ducati . . . milia, padre de uno Cardinal qual à de intrada ducati . . . milia, di uno Consier, uno Luogotenente in la Patria, uno che è di Pregadi ordinario, e il quarto sier Hironimo maridato in Cipro, à auto una gran dota et una herede; ha poi . . . fie legitime maridate et una natural, *videlicet* in sier Piero Mocenigo fo cao di X, in sier Piero Trivixan di sier Domenego procurator, in sier Giacomo Contarini qu. sier Piero, in sier Zuan Antonio Malipiero qu. sier Nicolò, in sier Zuan Francesco Loredan di sier Marco Antonio, e la natural in sier Zuan Foscarini qu. sier Nicolò; è lui sier